

**Tusagassiortut kalaallisut oqaluttunik amigaateqarnek qanoq  
iliuseqarfigisinaanerlutigu Oqallisissiatut siunnersuut.**  
(Inatsisartunut Ilaasortaq Nivi Olsen, Demokraatit)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Tusagassiortut kalaallisut oqaluttunik amigaateqarnerup iliuseqarfigineqarnissaa siunertaralugu Inatsisartuni ilaasortap Nivi Olsenip apeqquteqaat aallaavigalugu oqallittoqarnissaanik siunnersuutaanut Naalakkersuisut sinnerlugit qujavunga.

Tusagassiortut kalaallisut oqaasillit atorfinitsinneqartarnerinut sulisoriinnarsinnaanerinnullu tunngatillugu siunnersuuteqartoq pineqartunut attuumassutilinnik saqqummiussaqqarpoq. Kalaallisut oqaasilinnik pikkorissunik tusagassiortorpassuaqqarpoq tusagassiortunullu atugassarititat pitsaanerpaanissaat Naalakkersuisunit soqutigisaraarput. Siunnersuuteqartup tunngavilersuutitut allassimasaatut nunatsinni tamat oqartussaaqataanerit eqqarsaatigalugu pitsaasumik isornartorsortumillu tusagassiisarnissaq pingaaruteqqarpoq.

KNR-ip siulersuisorisimasaanik juni 2022-mi ataatsimeeqateqarnermi suleqatigiissitamik pilersitsisoqarnissaa kissaatigisimagaku iluoorpoq. Suleqatigiissitaliornissamili KNR-ip unammilligassai soorlu KNR-ip illorsua aammalu sulisut sulisoriinnarsinnaanerinut tunngassuteqartut pineqarsimapput.

Oqaatigineqassaaq nutaarsiassaleriffimmi pingaartumik tusagassiortut kalaallisut oqaasillit sulisoriinnarsinnaanissaanut aporfiusut pillugit KNR-ip Namminersorlutik Oqartussanik oqaloqatiginnittarnini taamanili aallartereersimagai. Tassungali tunngatillugu oqaatigissavara naalakkersuisoqqarfigimmi sulisussaaleqineq pissutigalugu suleqatigiissitamik pilersitsinissaq suli pisimangimmat, maannakkulli sanaartornermut pilersaarutinik pilersaarusoqataasussamik suleqatigiissitamik pilersitsisoqqarpoq. KNR-ip siulersuisui nutaat aprilip naalernerani ataatsimeeqatigineqqarput tassanilu ilaatigut oqaatigineqqarluni ukiamut pisortamik nutaamik atorfinitsitsisoqassasoq. Ataatsimiinnermi tassani KNR-ip siunissaa pillugu suleqatigiissitamik pilersitsisoqarnissaanik kissaat saqqummiunneqqarpoq aammalu suleqatigiissitamik suli pilersitsisoqarsimanginneranut patsisaasut nassuaatigineqqarlutik. Siulersuisut nutaat ataatsimeeqatigineqqarnerat Naalakkersuisut nuannaarutigaaq siulersuisullu KNR pillugu takorluugaat anguniagaallu piviusunngortinneqarnissaat qilanaarutigalugit.

Tusagassiortut kalaallisut oqaasillit KNR-imi nutaarsiassaqqartitsivimmit pisortani atorfinni allani namminersortunulluunniit atorfinittarnerinut akissarsiat patsisaaqataasut oqaatigineqqarpoq. Apeqquq taanna isumaqatiginninniartarnernut tunngassuteqqarmat isumaqatiginninniarnissat sioqqullugit naalakkersuinikkut pingaartitassaajunnartunik Naalakkersuisut saqqummiisinnaangillat. Naalakkersuisut isumaqatiginninniarneri piginnaatitsissutit aalajangersareerreqarsimasut aallaavigalugit ingerlanneqqartarput.

Tassunga ilanngullugu uparuarneqassaaq akissarsiat kisimik peqqutaanngimmata, aamma akuersaartumik aamma ikorfartuisumik suliffimmi avatangiiseqqarnek; suliffimmi qaffakkiartorsinnaalluni ineriartornissamat periarfissaqqarnek, suliffiup angerlarsimaffimmilu inuunerup oqimaatigigiissinneqqarnerat; attaveqqatigiilluarnek aamma kinguneqqarluartumik

akissuteqartarneq aamma nukittuunik inoqatinut attaveqarneq suliffimmilu suleqatiginneq sulisoqaannarnissamut ikorfartuutaapput.

KNR-ip Ilinniartitaanermut, Kultureqarnermut, Timersornermut Ilageeqarnermullu Naalackersuisoqarfimmut ilisimatitsissutigaa suliffeqarfimmi tamarmiusumi sulisut suliffimmi naammagisimaarinninnerat immikkoortortanilu ataasiakkaani oqimaalutaasarnerit 2017-imili ingerlanneqartalersimasut tamatumalu malitsigisaanik suliffimmi atugassarititat pitsanngorsarniarlugit suliniutinik aallartitsisoqarsimasoq. Ilaatigut pisortat, sulianik aqutsisut tassunga ilanngullugit aqqissuisuunerit pisortatut ingerlaavartumik pikkorissartinneqartalersimapput. Sulisut sulinnarsinnaanissaat siunertaralugu sulisullu pitsaanerusunik aallakaatitassioertalernissaat anguniarlugu sulisut piginnaanngorsarneqartarput. Suleqatigiissinnaanikkut pitsanngorsaanerit ingerlanneqartarput, tarnip pissusaanik ilisimasalinnillu siunnersortinnerit ingerlanneqartarsinnaallutittaaq. Tamatuma saniatigut immikkoortortaqaarfinni pisortat HR-immikkoortortaqaarfiullu akornanni suleqatigiittoqarpoq, ilaatigut sulisut naammagisimaarinninneranik misissuinerit inernerit unammilligassallu allat malitseqartillugit suliarineqartarlutik.

Radio aamma TV-immikkoortortaqaarfiit nutaarsiassaqaartitsivittulli unammilligassaqanngitsut ilanngullugu ilisimatitsissutigineqarpoq. KNR-imit ilanngullugu oqaatigineqarpoq sulisut inissaanik amigaateqarnerit qinnuteqartartut amerlassusaanut sunniuteqartartoq aammalu sulisut sulisoriinnarsinnaaneri eqqarsaatigalugit pisortat namminersortullu akornanni akissarsiat assigiinnginneri apeqqutaasartut.

KNR-ip nammineerluni isumaqatigiinniarsinnaatitaanissaa siunnersuuteqartup eqqaavaa. Isumagiinniartoqassatillugu illuatungeriit tamarmik soqutigisaqaqatigiinnit tunuliaqtsiisunit piunasaqaataajunnartunik ujartueqqaartarput. Sulisitsisut sinnerlugu Aningaasaqarnermut Sulisoqarnermullu Aqutsisoqarfik (ASA) tusagassiortunut, ingerlatsinermi teknikerinut kiisalu ilinniartunut/suliffimi misiliisunut tuungatillugu Naalackersuisut aamma Tusagassiinermi Sulisut Peqatigiiffiata (TP) / Dansk Journalistforbundip (DJ) isumaqatigiissutaanik immikkoortortaqaarfinnit atuisunit piunasaqaatinik ujartueqqaartarpoq. Isumaqatigiissutini pineqarput immikkoortuni pineqartuni Namminersorlutik Oqartussani (tassunga ilanngullugit suliffeqarfiit taakku ataaniittut), Nukissiorfiit, Tusass A/S, A/S Ini kiisalu kommunini tamani atorfillit. KNR suliffeqarfiit siuliani pineqartut aamma akornanniippoq tassungalu atatillugu Namminersorlutik Oqartussat ataanni suliffeqarfittut inissisimammat.

Tusagassiortunngorniartarneq eqqarsaatigalugu tusagassiortunngorniartarnerup soqutiginarsarneqarsinnaanera Naalackersuisut Ilisimatusarfimmik oqaloqatigiissutigerusuppaat.

Naalackersuisut KNR-ip siulersuisuinik naapitsisimanera pingaartippaat ataatsimiinnerni taamaattuni KNR-ip unammilligassai ilaatigut eqqartorneqartarmata. Tassunga ilanngullugu oqaatigineqassaaq Naalackersuisut KNR-imik pitsaasumik suleqateqarmata aammalu nutaarsiassaleriffimmi tusagassiortut sulisoriinnarnissaannut ikiuuffigisinnaasatsigut KNR ikiorsinnaajumallugu suleqatigiittariaqarnitsinnik siunnersuuteqartup saqqummiinera isumaqatigineqarpoq. Tamatuma saniatigut suliaq una pillugu Tusagassiortut Peqatigiiffiat pitsaasumik pissarsiaqarluarfiusumillu ataatsimeeqatigineqareerpoq.

Naggasiullugu tusagassiteqarneq pillugu partiit tamaasa peqatigalugit suleqatigiiusumik ukiunut arlariinnut isumaqatigiissusiortoqarsinnaanera Naalakkersuisunit kissaatigineqarpoq.

Taamatut oqaaseqarlunga inersuarimi oqallittoqarluarnissaanut Naalakkersuisut qilanaarput.